

MIZORAM BAPTIST KOHHRAN



**KRISTIAN
CHHÛNGKAW CHAWLHKÂR
THUZIR 2025**



**ZIAKTU
REV. R. LALRINLIANA**



Printed at the Baptist Printing Press, Serkawn 2025
bppserkawn@gmail.com 24022025
37,500 copies

THUHMAHRUAI

Kum 2005 atanga Mizoram Baptist Kohhranin kan hman tan Kristian Chhûngkaw Chawlhkâr chhûnga thuzir tûr chu buatsaih a lo ni leh ta a. Kumin 2025-a kan thuzir ziaik tûrin Administrative Committee chuan Rev. R. Lalrinliana chu a thlang a. Theihtâwp chhuaha tha taka a rawn ziaik thei hi Committee aiawhin a chungah lâwmthu kan sawi e.

Kumin hian May 12 - 18, 2025 chhûngin Kristian Chhûngkaw Chawlhkâr hi hman leh tûr a ni a. He thuzir hmang hian Kristian chhûngkaw chawlhkâr tha taka hmang theuh turin chhûngtinte leh Kohhrante ka ngên e.

Pathianni zîngah erawh chuan '2025 Ni Pawimawhte' phêk khat hmanga buatsaiha thupui dahsa hmangin sermon buatsaih tûr a ni ang.

Lalpa'n chhûngtinte malsâwmin kan ramah Krista lo lalber zêl rawh se.

Dated: 27th February 2025


Rev. Dr. R. Lalbiakliana
General Secretary
Mizoram Baptist Kohhran

KRISTIAN CHHÛNGKAW CHAWLHKAR THUZIR 2025

PROGRAMME

Date	Zirlai	Thupui
12.05.2025 <i>Thawhtanni</i>	1-na	Kristian chhûngkua din hi Pathian remruat a ni.
13.05.2025 <i>Thawhlehni</i>	2-na	Kristian chhûngkua i din ang u.
14.05.2025 <i>Nilaini</i>	3-na	Kristian chhûngkuaah Pathian Ram.
15.05.2025 <i>Ningani</i>	4-na	Kristian chhûngkua Kohhranah.
16.05.2025 <i>Zirtawpni</i>	5-na	Kristian chhûngkua ram siamthatnaah.
17.05.2025 <i>Inrinni</i>	6-na	Kristian chhûngkaw nun.
18.05.2025 <i>Pathianni Zing</i>	Sermon	Mahni chhûngte ngaihsak. (<i>I Timothea 5:8</i>)
18.05.2025 <i>Pathianni Zan</i>	Sermon	Pathian chibai bûk. (<i>Johana 4:23</i>)

ZIRLAI 1-NA

KRISTIAN CHHÛNGKUA DIN HI PATHIAN REMRUAT A NI

Bible chhiar tûr:

Genesis 1:26-28 "Tin, Pathianin, "Kan anpuiin, keimahni ang takin mihring siam ila, anni chu tuifinriata sangha chungah te, chunglêng sava chungah te, ran chungah te, lei chung zawng zawngah te, rannung leia bawkvâka kal zawng zawng chungah te thu i neihtîr ang u," a ti a.

Tichuan, Pathianin ama anpuiin mihring a siam a, Pathian anpui ngein a ni a siam ni; mipaah leh hmeichhiaah a siam a ni.

Tin, Pathianin anmahni mal a sâwm a: Pathian vêkin an hnênah, "Chi tam tak thlaha lo pungin, leilung hi luah khat ula, in thu thuin awmtîr rawh u; tuifinriata sangha chungah te, chunglêng sava chungah te, thil nung leia bawkvâka kal zawng zawng chungah te thu nei bawk rawh u," a ti a."

I. Kristian chhûngkua din hi Pathian remruat a ni.

Kristian chhûngkua din hi Pathian thil tum pawimawh tak a ni. Pathianin mihring a siam khân mipa a siam a, mipa chu amah chauha awm chu t̄ha a tih loh avângin, a kawppui âwm mi a nakruh aţangin hmeichhia a siam a

ni. Mipa leh hmeichhia chu pumkhata insiam a, chi inthlah chhâwng a, leilung luah khat tûrin malsâwmna a dah a ni.

Bawhchhiatna avângin Pathian thil tum leh ngaih pawimawh êm êm, Kristian chhûngkua din chu a lo tlawlh ta a ni. Mahse Pathian hmangaihna chuan Ama anpuia a siam mihring chu Kristian chhûngkua din tûra tan an lâk leh theihna tûrin, mahni leh mahni inphatin, Krista kal tlangin kawng a rawn buatsaih leh ta a ni.

Chhûngkua zînga Krista chênna leh thuneihna hmun chu Kristian chhûngkua a lo ni thei ta a ni. In chu kuta sak a ni a, chhûngkua chu thinlunga din a ni.

1. Inneihna: Kristian chhûngkua din tûr chuan Mipa leh Hmeichhia pumkhata insiamna aţanga din a ni. Mihring puitling pangngaiah chuan nupui pasal neih duhna thinlung kan pu deuh vek tih theih a ni. **Antonio** chuan, *“Inneihna hi Mipa leh hmeichhia zaa za (100%) inremna a ni mai lo va, insiamrem tawnna a ni zâwk,” tiin a sawi.*

Hmangaihna avânga nupaa insiam hi a tâwk mai lo va, nupa inkawp ţa tak ni tûr leh nupa hlim, Kristian chhûngkua din tûr chuan insiamrem tawnna te, inhriatthiam tawnna te, indawhtheih tawnna te, inngaihsak tawnna te neih a ngai a ni. Kan Nupui/Pasal te hi duhthusam an vâng hle ang, tu mah hi mi fel famkim kan awm loh avângin tlin lohna, chak lohna, fel lohna te nei kan nih avângin insiamrem tawn fo a ngai a ni.

1 Korinth 7:3-4 *“Pasal chuan a nupui hnênah a chan tûr tâwk chu pe rawh se; chutiang bawkin nupui pawhin a pasal hnênah a chan tûr tâwk chu pe bawh rawh se. Nupui chuan ama taksa*

chungah thu a nei lo va, a pasal chuan thu a nei zâwk a ni; chutiang bawkin pasal pawhin ama taksa chungah thu a nei lo va; a nupui chuan thu a nei zâwk a ni."

Nupaa insiam hi hmangaihna tihhlawhtlinna leh mamawh inphuhrûk tawnna ringawtah a innghat lo, chi inthlah chhâwnga Kristian chhûngkua din hi Pathian thil tum tihhlawhtlinna a ni tih hriat reng tûr a ni.

Chhûngkua din tûr leh chhûngkua ni mêkte hian Kristian chhûngkaw din hi ngaih pawimawh bera neih a tûl hle a ni. Nupui pasal la nei lote hian thianghlim taka Dân puitlinga inneih hi Pathian min buatsaih dân a ni tih hriat reng a pawimawh hle bawk a ni.

2. Hma lam thlîrna: Mi tam takin hma lam thlîrna thui tak kan neih loh avângin kan tûn dinhmun siamthat nachâng kan hre lo fo tshîn a ni. Sâp thufingah chuan ‘Naktûka thi tûrin inbuatsaih la, kum za dam tûrin hnathawk rawh’ tih kan hmu a. Chhûngkua kan din hian Kristian chhûngkua din tumna rilru kan neih tâwk loh avâng hian kan tûn dinhmun hi kan ngaih thah fo tshîn a ni. Kan tûn dinhmun kan ngaih thah avâng hian kan hma lama malsâwmna leh thil tsa kan dawn tûr tam tak kan dawn loh phah tshîn a ni. Sâp thufing pakhatin ‘Look before you leap’, (I zuan hmain i zuanna tûr en rawh) a tih ang hian, hma lam pana kan kal lai hian kan kalna tûr leh kan dâi tûr kan enchian hmasak a pawimawh hle a ni.

3. Chhûngkua a hlim: Chhûng tin hi chhûngkaw hlim tak leh nuam taka khawsak ho i duh em tiin inzâwt ta ila “duh e” tih hi kan chhânna a nih vek a rinawm. A nih leh kan chhûngkua hi kan hlimin nuam kan ti em? Famkim

lo mihring kan nih avângin tlin lohna leh chak lohna kan neih avâng hian kan duh ang pawhin kan awm thei t̄hîn lo a ni. Chhûngkua hlim taka awm a, nuam ti taka kan awm theihna t̄ur chuan, 'Kan chhûngkuaah Krista hi Lu bera kan dah thiam a ngai a ni.' Krista pawh khân kan chhûngkuaa a lo chên theih nân Vân ropuina thlahlel zo lovin, Pathian anga awm a, Pathian tluka awm chu thlâkhlelh hleih theihah ruat lovin, mihring anga lo piangin bâwih angah a insiam a, thi khawp hiala thu zawmin kraws-ah a nunna a hlân a ni.

Hebrai 4:15-ah chuan, Puithiam Lalber kan chak lohnate min hriatpui thei lo nei kan ni si lo; keimahni anga kawng tinrênga thlêmna tâwk tawh, sual erawh chu sual lo, nei kan ni zâwk e, tih kan hmu a. Puithiam lalber Krista, keimahni anga thlêmna tinrêng tâwk, mahse sual erawh chu sual lo, Krista kan neih tlat chuan, chhûngkua hi a hlim lo thei lo a ni.

Mihring felna leh t̄hatna ringawt hi chuan hlimna leh lâwmna, lungawinate hi neih har tak a ni, Krista kan neih tlat erawh chuan engkimah nuam kan tiin kan hlim dâwn a ni. **Albert Einstein-a** chuan 'He nun ram mawi takah hian i chhûngte nêh hlim takin awm rawh u' a tih ang hian, hlimna hi a thlâwnin a lo awm mai lo va, keimahni ngeiin chhûngkaw hlim kan siam thei a ni.

ZIRLAI 2-NA

KRISTIAN CHHÛNGKUA I DIN ANG U

Bible chhiar tûr:

Ephesi. 6:1-4: Naupangte u, Lalpaah chuan in nu leh in pate thu zâwm rawh u; chu chu thil dik a ni si a. I nu leh i pa chawimawi rawh, chu chu thupêk tiam nei hmasa ber a ni. Chutichuan, i tân a ðha ang a, leiah hian i dam rei bawh ang. Tin, nângni pate u, in fate tithinur suh ula, Lalpa thununnaah leh zilhnaah chuan enkawl zâwk rawh u.

Kristian chhûngkua: Bible-ah Kristian tih ðawngkam hi Thuthlung Tharah hian hmun thumachauh kan hmu a ni.

*Tirhkohte 11: 26 “...Antiokei khuaah chuan a ni, zirtîrteho chu **Kristian** an tih hmasak ber ni.”*

*Tirhkohte 26:28 Agrippa chuan Paula hnenah, “Rei lo tê chauh thlêma **Kristiana** mi siam i tum a nih hi!” a ti a.*

*I Petera 4:16 “Amaherawhchu, **Kristian** a nih avângin tuar sela zak suh se.”*

Kristian tih ðawngkam kan hmuh aţang hian Kristian tih chu: Krista mi ni tûra inpe, Krista zuitu tihna a ni. Hun lo kal zêlah Krista zuitu ni lêm lote pawh Kristian tih an lo

ni ta zêl a, Kristian nihna dik tak chu a lo hloh ta tial tial a, Krista zui lote pawhin Kristian an lo inti ta zêl a ni. Tunlai dinhmunah pawh hian Kohhrana hming kan ziah a, kan inkhâwm hian Kristian chu kan inti ve mai a, mahse Kristian nihna dik tak chu a keng zo lo a ni.

Kristian dik tak chu Pathian ațanga piangthar ngeite hi an ni. **Johana 3:3** “...mi tupawh an **pianthar** loh chuan Pathian ram an hmu thei lo vang,” a ti a. **I Peter 1:23** “Chi chhe thei lakah ni lovin, Pathian thu nung reng leh awm rengah chuan chi chhe thei lo laka **piang thar** in ni zâwk si a.”

Lal Isua Krista hna thawh, a thihna leh thawhlehnate chu kan sual tlan nân a tâwk zo a ni tih ringa pawmtute hi Kristian dik tak chu an ni. Kristian chhûngkua din tûr chuan a hminga Kristian mai ni lo, Kristian dik tak kan nih phawt a ngai. Kristian chhûngkua tih leh chhûngkuua Kristian tih hi han bihchiang dâwn ta ila:

Kristian chhûngkua tih hi chuan a vântlang hlein a lang, miin a nihna a sawi hian, Kristian chhûngkuua seilian an tithla ve ringawt a, mahse, a nihna takah chuan piantharna pawh nei lêm lo, Krista chu Lal leh Chhandamtu atân pawha pawm chuang si lo hi chuan Kristian chhûngkua nihna dik tak an nei lo a ni.

Chhûngkuua Kristian kan tih chuan, chhûngkaw member, chhia leh ța hriatna nei tawh phawt chu Krista Lal leh Chhandamtua pawmtu anni tihna a ni, chhûngkuua piangthar vek hi chhûngkuua Kristian chu an ni.

Marge Kennedy chuan, “Kristian chhûngkua chu harsatna kan tawh nasat lai ber pawha malsâwmna kan dawn tûr min thlir tûr tlat thintu a ni,” a ti.

Kristian chhûngkua din tûr hian mawhphur deuh bika ngaih kan nei thei âwm e, pa emaw, nu emaw, fate emaw, mawhphurtu tûrah kan inngai tawn a ni mai thei, mahse chhûngkaw member zawng zawng hian mawhphurhna kan nei vek a ni. Hetiang hian lo sawi zau dâwn ta ila:

1. Pa Mawhphurhna: Pa mawhphurhna hi hmânlai aţang tawhin chhûngkuaa rorêltu ber leh thuneitu bera ngaih a ni. Chhûngkuaa Pa chu hotu ber leh puithiam chan chang tûra ngaih a nih rualin Pathian chu a chung a rorêltu a ni tih a hriat a ngai a ni. Pa chu chhûngkua venghimtu, ruahmanna siamtu, kaihruaitu leh mamawh puhru tûr a nihna hi Pathianin a mawhphûrhnaah a dah a ni tih hriat a, tihhlawhtlin ngei tûr a ni.

Chhûngkuaa Pa chu chhûngkaw khawsak leh rorêltu a nih bâkah Thlarau lamah te, ngaihtuahna senna kawngah te leh chhûngkuaa fel fai taka ruahmanna siamtu tûr a ni. Chhûngkuaa Pa chu a nupui nen inpawhna tha tak siam a, fate hmangaihna nêna enkawl tûr leh Pathian thu zawm tûra zirtîrtu a ni a, Bible-in a sawi anga tun dinhmunah leh an hun lo awm zêl tûra thurâwn petu tûr a ni baw k a ni.

Pa chu chhûngkuaa puithiam a nih avângin a nupui leh fanaute chu chhûng inkhâwm te, kohhrana an tih theih ang tâwka inhmang tûra zirtîr leh kaihruaitu pawimawh tak a ni.

2. Nu Mawhphurhna: Chhûngkua hi zirna in hmasa ber tih chu kan hre fo tawhin ka ring, chhûngkuaa zirtîrtu hmasa ber leh pawimawh ber chu Nu hi a ni. Pa chu chhûngkuaa rorêltu, enkawltu leh Puithiam ni mahse in lamah a awm tam loh òthin avângin naupangte zirtîr tûr chuan Nu hi zirtîrtu hmasa ber leh pawimawh ber a ni, a bik takin School an kal hma leh School an kal òtan tirhah an pawimawh leh zual a ni.

Mi thiam (psychologist) te chuan naupang chu kum sâwm pathum a tlin tawh chuan i um pha ngai lovâng an ti a. Nu chu fate pian tîrh aţanga hnutea châwma enkawltu hmasa ber a nih avângin an fate kum sâwm pathum an tlin hma ngeia an rilru ngaihtuahna leh an nungchang siampuitu pawimawh tak a ni.

Ezekiela 16:44 “*Ngai rawh, thufing tawi hmang apiangin he thufing tawi hi an hmang ang, ‘A fanuin a nu a chhûn’ tih hi.*” Thil tamtakah fate hian nu chhunna lai hi an ngah a, chuvângin nuin a fate tih atâna a duh loh tûr chu a ni pawhin a tih loh a òtha a ni.

Fate hian Pa aiin Nu te hi an hlauh loh hma deuh òthin avângin Pa hriat loha fate thil tihpui emaw, thil tihîr hi a pawî òthin avângin, pain a hriat an hlauh chu a fate pawh tihîr loh mai a him ber a ni. Chhûngkua chu Pa rorêlna a nih avângin, Nu rorêlna chhûngkua chu a buai òthin, Pa te zâi ngaia ro a rêl erawh chuan chhûngkua khawsak a fel a, a nuam a, a hlimawm bawk a ni.

3. Fate Mawhphurhna: Naupangte hi Lalpa laka nu leh pate rochan duhawm tak an ni a, an lo puitlin huna khawtlâng leh Kohhrana hruaitu tûrte an ni. Naupang an

ni a, an chhia leh ãa hriatna a la tlêm a, zirtîr leh kaihhruai an ngai hle a ni. Naupang chuan mahni tâna ãa tûr leh ãa lo tûr pawh an la hriatthiam tak tak loh avângin nu leh pate hian naupangte enkawl leh kaihhruaina kawngah mawh an phûr a ni.

"Naupangte u, Lalpaah chuan in nu leh in pate thu zawm rawh u; chu chu thil dik a ni si a.

"I nu leh i pa chawimawi rawh," (chu chu thupêk tiam nei hmasa ber a ni.) "Chutichuan i tân a ãa ang a, leiah hian i dam rei bawh ang," (Ephesi 6:1-3) a tih ang hian naupangte pawhin nu leh pate thu awiha an thu zawm tlat tûr a ni.

Kristian chhûngkua din tûr chuan Pain chhûngkuaa a mawhphûrhna a hlen chhuah a ngai a, chutiang bawkin Nu pawhin mawhphûrhna pawimawh tak tak a neih hi a tihhlawhtlin a ngai a. Naupangte pawhin Nu leh Pate thu ãa taka an zawm chuan Kristian chhûngkua duhawm tak an din thei dâwn a ni.

ZIRLAI 3-NA

KRISTIAN CHHÔNGKUAH PATHIAN RAM

Bible chhiar tûr:

Luka.17:20-21 "Tin, Pharisaiten Pathian ram lo thlen hun tûr an zawh avângin an hnênah, "Pathian ram chu hmuh theihin a lo thleng lo ve; 'En teh u, heta hi!' emaw, 'Sawta saw!' emaw an ti hek lo vang; ngai teh u, Pathian ram chu in zîngah a awm a ni," a ti a, a chhâng a.

Thupuan. 12:7-10 "Tin, vânah chuan indona a lo awm a; Mikaela leh a vântîrhkohte chuan drakon chu an do va; drakon leh a tirhkohte pawh chuan an do ve a; nimahsela an hneh ta lo va, an hmun chu vânah a awm ta bawh hek lo. Tin, drakon lian pui, rûlpui tar Diabola leh Setana an tih, khawvêl zawng zawng bumtu chu an paih thla ta a; leiah an paih a, a tirhkohte pawh an paih thla tel ve a. Tin, vânah chuan aw ring takin, "Tûnah chuan kan Pathian chhandamna leh thiltihtheihna leh ram chu a lo thleng ta, a Krista thuneihna nen; kan unaute hêktu, kan Pathian hmaa achhûn azâna hêk thintu chu an paih thla ta si a.

Chhôngkuaah Pathian Ram: Chhôngkaw din hi Pathian ruahmanna leh thil tum a nih rualin, ama chên theihna tûra buatsaih hi a tum a ni. Pathian awmna leh rorêlna hmun apiang chu a ram a ni nghâl zêl a ni. Pathian Ram

kan tih hian khawvêl lal ram anga ramri nei a ni lo va, mimal nuna thu a neihna hmun apiang chu Pathian Ram a ni. Entirnân mi tupawh a pianthar chuan Pathian duh dân anga awm tûrin a inpê a, a nunah Pathianin ro a rêl avângin a nunah Pathian Ram a thleng tihna a ni.

Pathian Ram tih hi sap ɽawngah chuan ‘Kingdom of God’ tih a ni a, Pathian lalna hmun tihna a ni. Hebrai ɽawnga ‘**Malekut**’ tih leh Greek ɽawnga ‘**Basileia**’ tih hi thu thuhmun a ni a, a awmzia chu, khawvêl lalte chuan mi ram an va hneh lâk a, an chakna leh thiltihtheihna hmanga ro an va rêl ang ni lovin, mahni inphah hnuai a, an angchhûnga intulût a, an thu thua awm tûra inpe a, an rorêlna hnuaia awm tûra intûkluhna hi a ni.

Chhûngkua chu Pathian duhzâwnga a awm a, a thu thua a awm a, a rorêlna hnuaia a awm a, a angchhûnga a intûkluh hian chhûngkuaah Pathian Ram a thleng tihna a ni a, Pathian Ram thlenna chhûngkua chu Kristian chhûngkua a lo ni ɽhîn a ni.

1. Nun a zalên: Mi tin mai hian zalên taka nun kan duh, khuahkhirhna hnuaia awm chu thil nuam a ni lo. Zalên tih avâng a thawveng taka awm a, eng pawh tih a thiang tihna a ni lo. Pathianin duh thlang theia zalênna min pêk hi duh thlang thei lova min thununtu a awm hian kan zalên lo tihna a ni.

Kum 1608-a British Sawrkârin East India Company an rawn din khân a tîrah chuan an sumdâwnpui a, a tâwpah chuan India ram chu hnehin an awp ta a, a hnuaia chuan India chu British Sawrkâr thuneihna hnuaiah a lo awm ta a, India chu ama ramah zalên lo takin a awm ta a ni. Mahatma Gandhi khân theihtawp chhuahin kum 1947

August ni 15 khân British Sawrkâr lak aţang khân an lo zalên ta a ni.

Kum zabi 17 bâwr vêl khân America-ah chuan Sal an awm a, sal chu mihring mah ni se a leitu thu thua awm a ngaih avângin a zalên lo a ni. Abraham Lincolna President a lo nih khân salho chu a chhuah zalên ta a ni. Chhûngkua pawh hi sualin min bâwih a, zuin min bâwih a, drugs leh thil   a lo tam takin min bâwih avângin kan zalên lo     n a ni.

Kristian chh  ngkuaah chuan Pathianin duh  hlanna min p  k hmangin thil sual leh   a lo zawng zawng an hn  wl avângin an inhmangaih a, an duh hun apiangah an kh  wm a, an zai a, Pathian an fak a, an hlima an zalên a ni.

2. Thlarau thianghlim a zal  n: Thlarau thianghlim chu (Omni-present), khawi hmunah pawh a awm vek a, mihring thinlung chh  nga awm hi a duh ber a, mi piangtharte hn  nah a ch  ng     n a ni. *Pathian Thlarau hr  aia awm apiangte chu Pathian fate an ni si a. (Rom. 8:14).* Thlarau Thianghlim chu nunna petu, nunna bulpui, chakna leh thiltihtheihna petu, finna te, huaisenna te, dawhtheihna te, hmangaihna te, mals  wmna te petu a nih av  ngin piangthar nun chu a lo zal  n     n a ni.

Kristian chh  ngkua chu mi piangthar chh  ngkua an nih av  ngin inrem lohna te, inhuatna te, inngeih lohnaten hmun an chan theih loh av  ngin an hlimin nuam an ti a. Chh  ngkua an inhmangaih a, an induhsak a, tihsual palh leh tih dik loh palhah pawh an inhrethiamin an inngaidam tawn     n a ni.

Chhûngkuaah Thlarau Thianghlim a chên tlat chuan sualin hmun a chang thei lova, Thlarau Thianghlim chuan an nunah thil t̄ha ti t̄urin a zirt̄ir a, kawng dik a kawh hmuh t̄h̄in a, chhûngkua intihbuainain hmun a chan loh avângin an nun a zalên t̄h̄in a ni.

3. Pathianin ro a rêl: Rorêlna hi thil t̄ul leh pawimawh tak a ni, rorêlna dik leh fel awm lohna hmun chu a buai nuaih t̄h̄in a ni. Kan ram buaina ber pawh rorêlna dik leh fel a awm t̄h̄in loh vâng a ni. Chhûngkua pawh rorêlna dik leh fel a awm t̄h̄in loh avângin a buai t̄h̄in a ni.

Pathianin chhûngkua hi awmze nei taka a din a ni a, chhûngkua chu ama duhzâwng leh a rorêlna hmun atân a din a ni. *Pathian an t̄ih avângin chhûngkua neiin a siam ta a tih Exodus 1:21*-ah kan hmu a ni. *Rorêlna chu Pathian chhûngteah hian t̄an a hun tawh si a I Petera 4:17*-ah kan hmu leh bawk a ni.

Chhûngkuaah chuan a t̄lângpuiin Pain ro a rêl t̄h̄in a, Pa chu mi famkim a nih loh avângin chhûngkaw rorêlna a buai châng a awm t̄h̄in a ni. *“Amaherawhchu, mipa tawh phawt lû chu Krista a ni, hmeichhe lû chu mipa a ni, Krista lû chu Pathian a ni tih in hriat ka duh a ni,” tih I Korinth 11:3*-ah kan hmu a, helai thua hian Pa chu chhûngkuaa rorêltu nimahse, Pa aia thu zâwk leh chungnung zâwk Krista a awm a, Krista aia chungnung leh zâwk chu Pathian a ni.

Kristian chhûngkuaah, Pathian chu engkim chung a rorêltu leh thuneitu a nih avângin engkimah Pathian kuta inkawl t̄irin, Pathian duh dân leh a rorêlna ang zêlin an awm t̄h̄in a ni.

ZIRLAI 4-NA

KRISTIAN CHHÛNGKUA KOHHRANAH

Bible chhiar tûr:

***Mathaia. 16:18-19** “Tin, nang Petera i ni tih ka hrilh bawk a che; he lungpui chungah hian ka kohhranho ka rem chho ang a, Mitthi Khaw kulh kawngkhârte chuan chu chu an ngam lo vang. Vên ram chabite ka pe ang chia, lei chungah engpawh i phuar apiang vânah phuar a ni ang a; lei chungah engpawh i phelh apiang vânah phelh a ni ang,” a ti a, a chhâng a.”*

***Tirhkohte. 20:28** “Pathian kohhranho, ama thisena a leite chu châwm tûrin, nângmahni leh in hote zawng zawng chungah chuan fîmkhur rawh u, Thlarau Thianghlimin an chungah hotuah a siam che u hi.”*

Kohhran hi chhûngkua ațanga din a ni: Kohhran hi Pathianin khawvêla a ram zauh zêl tûr leh din tûra a buatsaih a ni, chhûngkua tel lo chuan Kohhran hi din theih a ni lo, chhûngkaw tinte rilru hmun khata thawhhona leh inpumkhatna ațangin Kohhran hi din a ni. Khawvêla Pathian ram a lo zau va, a lo ngheh a, a lo lan fiah deuh deuh theih nân chhûngkaw tin hian mawhphurhna pawimawh tak a nei a ni.

Thlahtu Adam leh Evi te bawhchhiatna avânga Pathian nêh tihhrana an lo awm hnu khân, Pathian hmangaihna chuan an bawhchhiatnate chu Lal Isua kal tlangin ngaihdamna arawn puang ta a. Khawvêl sualna zawng zawng chu sualna nei lo Lal Isua chungah nghatin, ani chuan khawvêl sual phurin, khawvêl mite thih aiin a thi a, kraws-ah khenbehin a awm ta a ni.

Lal Isua, mi sualte thih aia a thihna chhan chu chhûngkaw tina Kristian chhûngkaw din, a thil tum tihhlawhtlinna a ni a, Kristian chhûngkua chu Kohhranah a din a, Kohhran chu tângkai zâwk leh chak zâwka khawvêla a hnathawh chhunzawm tûrin a duh a ni.

Dr. Lawson Murray chuan, “Chhûngkaw chak tak hian Kohhran chak tak a din a ni,” a ti a, chhûngkua chak tak ni tûr chuan Kristian chhûngkua din phawt a ngai a ni. Chhûngkua tel lo chuan Kohhran a din theih loh va, Kohhran din a nih loh chuan Pathian ram a zau thei dâwn lo va, chuvângin Pathian ram a lo zau zêl theihna tûr chuan Kristian chhûngkua chak tak din hi a pawimawh hle a ni.

1. Kohhran nihna: Kohhran chu thil pawimawh thawk tûra pâwl intêlkhâwm a ni a, Kohhran a lo dinna chhan chu khawvêl ram pumpui hi Pathian rama siam leh din hi a ni. **I Timothea 2:4** ah chuan, *“Ani chuan mi zawng zawng chhandama awmah leh thutak hriaah a duh a ni,”* tih kan hmu a ni.

Kohhran chu pâwl angin awm mahse, khawvêla pâwl inzawmkhâwm nen chuan a inâng lo a ni. Khawvêla pâwl hrang hrang dinte chuan anmahni hamthatna tûr

leh khawtlâng thatna tûr thil an ngaihtuah a, an thil ngaihtuahte hi an damchhûng atân chauha ɽangkai a ni.

Kohhran chu Krista thisena lei, Thlarau Thianghlimin a chênchilh, Pathian hriatpuia din a nih avângin a nghet a, tûn damchhûng atân chauh ni lovin, chatuan daih tûra din a ni. Kohhran tih hi Thuthlung Hluiah chuan, Hebrai ɽawng, ‘**Qahal**’ leh ‘**Eddah**’ tih ɽawngkam hi hman a ni a, a awmzia chu ‘koh’, ‘ruat’ tih leh ‘tihtûr neia pungkâwm’ tihna a ni. Thuthlung Tharah chuan Greek ɽawngin ‘**Kyriakon**’ leh ‘**Ekklesia**’ tih hman a ni a, ‘Lalpa ina ringtute Pathian chibai bûk tûra awmkhâwm’ leh ‘ringtute tihtûr neia awmkhâwm’ sawina a ni.

Tichuan, Kohhran chu Pathian tân chauha thawk tûra din a ni, mimal hamthatna tûra din a ni lova, Kohhrana kan thiltih leh rawngbâwlna zawng zawng hi Pathian avâng leh Pathian tâna thawk kan ni. Kristian chhûngkuate hi Kohhrana kan rawngbâwlna hi mihring tân a ni lo va, Pathian tân chauh a ni tih hriain phûr tak, châk tak leh ɽahnemngâi takin i thawk zêl ang u.

2. Kohhran innghahna: Kohhran chu Pathianin a mite kaltlanga a din a nih avângin a ɽhang chak a, a ɽhang lian tual tual a, a lo ropui tial tial ɽhîn a ni. Kristian chhûngkua tel lovin Kohhran hi din theih a ni dâwn lo a ni.

Khawvêlah hian chhûngkua tam tak awm mahse, Kristian chhûngkua an nih loh chuan Kohhran a din theih chuang loh a ni. Kohhran chu Pathian tâna din, Pathian ta a ni a, mi piangthar, Krista thisena hrinte an nih avângin piangthar lo tân chuan din ngaihna a awm lo a ni.

Kohhran inngahna chu Pathian a ni kan tih rualin Pathianin a hmanrua atâna a hman ber chu Kristian chhûngkua te hi an ni. Kristian chhûngkua chuan Krista chu lal ber leh rorêltu atân an neih tlat avângin Kohhran tân thahnem an ngai a. Malsâwmna an dawn— thlâi, sum leh pâi te chu sâwma pakhat Kohhran tân an hlan thîn a ni. Sâwma pakhat chauh ni lovin, sâwma pakua atang pawhin an theih ang tâwk leh a tûl dân ang zêlin thilpêk an pe bawk a ni.

Kohhran chuan sum leh paite, thilpêk a dawn chu a tangkai thei ang bera hmangin, Pathian ram zauh nân leh thlarau bo man nân a hmang thîn a ni. Tin, hei bâkah hian, chhûngkaw tinte Kristian chhûngkua an lo nih ve theih nân tangkai takin a hmang a, mi harsa, damlo, tanpui ngaite tanpui nân a hmang bawk thîn a ni. *Lal Isua'n hêng mite berte chung a in tih chu ka chung a ti in ni a* tih hi Kohhran ngaih pawimawh ber pakhat a ni.

Kristian chhûngkuate hi in la hrang vek ta ila, Kohhran hi a ding thei dân lo va, *Lal Isua thupêk khawvêl zawng zawnga kal a, chanchin tha hril tûra a tih hi a theih dân lo va*, mi harsa leh chanhai zâwkte tanpui pawh a theih dân lo a ni. Kristian chhûngkua chu kawng engkima Kohhran inngahna a ni tih hriain, Pathian ram a lo zau zêl theih nân thahnemngai taka tan lâk zêl hi a pawimawh hle a ni.

3. Kohhran chakna: Kohhran Lu chu Krista a ni a, Kohhran hmalâkna leh rawngbâwl na kawng hrang hrangah Krista thu leh hla ngaichâng lo va, mihring duh dân leh tha tih dân anga a kal chuan Kohhran hi a thuanawp a, a chau thîn a ni.

Mihring taksa pawh hi Lûin ro a rêl loh chuan taksa pumpui a buai thîn. Lû a nat emaw, a hai emaw chuan taksa dang zawng zawng pawh hi a chau thîn a ni. Lûin tha tak leh fel taka ro a rêl theih nân taksa dang, kut, kê, mit, beng, hnar, pumpui, kâte hian hna tha taka an thawh a, an tih tûr theuh an tih a ngai a ni. Taksa zinga a tu emaw ber pawhin a tih tûr a tih that loh chuan Lûin a tuar a, Lûin a tuar chuan taksa pumpui pawhin a tuar nghâl thîn a ni.

Kan zir tawh ang khân, Kohhran chu Kristian chhûngkaw tin thawhona hian a siam a, chhûngkaw mal emaw, chhûngkua aţanga mimal emaw pawhin a tih tûr a tih that duh loh chuan Kohhran hian a tuar thîn a ni. Kohhran chakna leh inngahna pawimawh tak pakhat chu chhûngkua hi a nih tlat vâng a ni.

Chhûngkua hi Kristian chhûngkuaa kan insiam loh chuan Kohhran hi chak ngaihna a awm lo va, chhûng tinte Kristian chhûngkuaa kan insiam a, Kohhrana kan mawhphûrhna theuh thahnemngai taka kan thawh hian Kohhran chu a lo chak thîn a ni.

Kristian chhûngkaw tinte hian Kohhran a lo chak deuh deuh theih nân theihtawp chhuah a, Kohhrana kan mawhphûrhna hi hlen zêl tûra ţan lâk sauh sauh hi thil tûl tak a ni.

ZIRLAI 5-NA

KRISTIAN CHHÛNGKUA RAM

SIAMTHATNAAH

Bible chhiar tûr:

Gen. 1:9-12: Tin, Pathianin, "Vân hnuaia tuite chu hmun khatah awm khâwm sela, khawmual chu lang rawh se," a ti a: tichuan chutiang chu a lo ni ta a.

Tin, Pathianin khâwmual chu "Lei" a vuah a; tui awm khâwmte chu "Tuifinriatte" a vuah a: tin, Pathianin chu chu a en a, ̣ha a ti hle a.

Tin, Pathianin, "Leiin hnim te, thlai chi nei te, thei kûng, leia anmahni chi awm dân tûr anga rah, a rah chhûnga a chi awmte chu chhuah rawh se," a ti a: tichuan chutiang chu a lo ni ta a.

Tichuan lei chuan hnim te, thlai anmahni chi awm dân tûr anga chi nei te, thing anmahni chi awm dân tûr anga rah, a rah chhûnga a chi awmte chu a chhuah ta a: tin, Pathianin a en a, ̣ha a ti hle a."

Kristian chhûngkua, Ram siaṃthatna kawngah a pawimawh: Leilung leh a chhûnga thil awm zawng zawng hi Pathian siam a ni a, a thilsiamte chung a thuneitu leh rorêltu a ni. Pathianin a thilsiam zawng

zawngte hi chhan nei vekin a siam a, amah chawimawia a ropuina puangchhuak tûrin a duh a ni.

Mihring tih loh hi chuan Pathian thilsiam dang zawng zawngin an awm dân tûr ang takin hna an thawk a ni. Pangparin a nih dân tûr ang takin a hun takah mawi takin a par a chhuah a, sava pawh a hram dân tûr ang takin a hun takah mawi takin a hrâm a, thlaite pawhin a hun takah rah chhuahin a chi tûr thlengin a siam a ni. Hla siamtu chuan **‘zingah sava ten Pathian an fak a, pangparin a ropuizia a entîr fo, mihring chauh lo chu zirtîr an ngai lo’**, tiin hlaah a lo phuah chhuak a ni.

Bawhchhiatna avângin mihring chuan mahni mawina leh ropuina a ngai pawimawh a, a siamtu Pathianin a siam chhan an hrechang lo fo thîn a ni. Khawvêla thilsiam dâng zawng zawngte chu an nih dân tûr ang takin an awm a, mihring erawh chu kan awm dân tûr anga kan awm loh avângin Ram chu tihchhiatin a lo awm a, sual leh thil t̃ha lo tam tak hian hmun an chang mêk a ni. Pathianin duh taka a siam Ram chhe mêk siam̃tha tûr hian Kristian chhûngkuate hian mawphûrhna lian tak kan nei a ni.

1. Ram hi Pathian min pêk: Ram hi Pathianin a mite chên nâna min pêk a ni a, a duhzâwng anga hmang tûr kan ni. **Sam. 22:28** ah chuan, *“Ram chu LALPA ta a ni a: Hnam tin chung a rorêltu a ni si a,”* tih kan hmu a ni, ram hi Pathian duhzâwnga hmang tûr chuan, Pathian duhzâwng hriat a ngai a, tawngkam pahnih hman a ni a, pakhat chu, **‘Baule’** tih a ni a, pakhat leh chu **‘Thelema’** tih a ni.

Baule tih chu rilru fîm taka ngaihtuahna hmang chung a thiltih sawina a ni a, **Tirkohte 2:23** ah chuan, “...*kha mi kha Pathian rêl tlat leh hriat lâwk angin an man târ a, nangnin mi sualte kutin krawsah in khêngbet a, in tihlum ta a,*” tih kan hmu a, Isua kha Pathian ruahman lâwk anga khenbeh a nih thu a sawina a ni.

Thelema tih erawh chu Pathianin mihringa duhthlanna a pêk aṭanga Pathian duhzâwng tih a hi a ni. Mihringin Pathian duhzâwng hre reng chung a tih a duh leh duh lovah a innghat a ni. Pathian thu (Bible) a kan hmuh, mihringte tih târ leh tih loh târ tam tak a awm thei ang. Sual bawiha kan tlûk luh loh te, Pathian dang neih loh te, mahni inhmangaih anga vêngte hmangaih târ te, rûk rûk loh te, mi thil awh loh te, Uire loh te, milem biak loh te, etc. hêng bâkah pawh thil tam tak a awm ang. Heng zawng zawng tih leh tih loh chu mihring duhthlannah a innghat a ni.

Kristian chhûngkua chuan Pathianin a thu (Bible) hmanga tih târ leh tih loh târ min pêkte hi ṭha taka zawm a, Pathian min duh dân leh Ram min pêk chhan ang taka hmang târin Kristian chhûngkua min buatsaih a ni tih hriatreng a pawimawh hle a ni.

2. Kristian chhûngkua chu Ram nuam siam târa buatsaih a ni: Pathianin Ram min pêk siam nuam târ chuan Pathian duhzâwng anga awm a ngai a, Pathian duhzâwng anga awm târ chuan Kristian chhûngkua din hmasak a ngai a ni. Kristian chhûngkua tân lo chuan Ram hi siam nawm theih ni hian a lang lo.

Ram siam nuam tûrin sawrkarin theihtawp a chhuah a, YMA leh khawtlâng hruaitute pawhin theihtâwp an chhuah, mahse kan Ram hi a nuam zo tak tak lo, mihring thahnemngaihna aţang ringawt hi chuan Ram siam nawm hi thil har tak a ni. Ram hruaituten sum tam tak sêngin hmun nuam tak tak han siam bawk thîn mahse, a nuam zo tak tak lo. Ram siam nawmna hmanraw tha ber chu hmangaihna hi a ni. Hmangaihna awm lohna hmun chu khawi lai mah hi nuam a awm tak tak thei lo, chutiang bawkin, hmangaihna awmna hmun chu hrehawm a awm ngai lo a ni.

Lei leh vân inrem tawh lo pawh hmangaihna chuan a inrem tîr leh thei a ni. Rom bung 12 kan en chuan, hmelma pawh ni se, an ril a tām chuan eitûr pe tûr leh an tui a hâl chuan in tûr pe tûrin min ti a ni. Hmangaihna chuan hmelma a nei lo va, huat zâwng pawh a nei hek lo a ni. Hmangaihna chuan nula tlangval a phuar khâwm a, nupaah, pumkhatah a siam a, unau a phuar khâwm a, chhûngkua a suih khâwm a, Kristian chhûngkua an lo din ta thîn a ni.

Chhûngkaw tin hi Kristian chhûngkua chu ni se, ram hi a nuam ngei ang tih hi a rinawm a ni. Kristian chhûngkuaah chuan hmangaihna in ro a rêl a, a nuam thîn a ni. Pathianin Ram min pêk hi nuam taka siam a nih theih nân hmangaihna in Kristian chhûngkua i din zêl ang u.

3. Kristian chhûngkua chuan Ram siam tha tûrin mawhpûrhna a nei: Ram chu Pathianin a mite chên nâna a pêk a nih avângin, Kristian chhûngkuate hian Ram siam thatna kawngah mawhpûrhna thui tak an nei

a ni. **Kenneth Saffin-a** chuan, “*Khawtlâng sualna do tûr chuan chhôngkuaah bul tạn a ngai a, a nih loh chuan sual hi kan do hneh thei ngai lo vâng,*” a ti. Khawtlâng sualna do va, siam t̄ha tûr chuan Kristian chhôngkua kan din hmasak hi thil pawimawh tak a ni.

Thil eng pawh siam t̄ha tûr chuan a bul t̄hut aṭanga hma lâk a ngai a, a l̄er lam ringawta hmalâkna chuan rei a daih lo va, a tlo ngai lo a ni. Kan khawtlâng pawh hi chhôngkua aṭanga insiam vek a ni a, chhôngkua a t̄hat loh chuan khawtlâng siam t̄hat ngaihna a awm lo a ni, khawtlâng siam t̄hat a nih loh chuan Ram pawh a siam t̄hat theih dâwn loh a ni. **Mother Teresa** chuan, “*Khawvêla remna leh muanna awm tûra hma i lâk dâwn chuan, inah haw la, i chhôngte hmangaih hmasa rawh,*” a ti bawh a ni.

Confucius-a chuan, “*Ram chakna chu chhôngkaw inpumkhatna leh thawhhona aṭanga inṭan a ni,*” a ti. Kan ram leh khawtlâng siam t̄ha tûr leh siam nuam tûr chuan Kristian chhôngkuate hian mawhp̄h̄rhna lian tak kan nei a ni tih hria a, t̄hahnemngai taka hma kan lâk hi a t̄ul takzet a ni.

ZIRLAI 6-NA

KRISTIAN CHHUNGKAW NUN

Bible chang tûr:

Hebrai. 3:1-6 “Chutichuan, unau thianghlim, vên kohna chang vete u, kan thurina Tirhkoh leh Puithiam Lalber, Isua chu, ngaihtuah rawh u; Pathian chhûngte zawng zawng zingah Mosia a rinawm ang bawok khân, ani chu ruattu lakah chuan a rinawm a ni. Chhûngkaw puipa chu a chhûngte aiin an chawimawi zâwk ang ngeiin, ani chu Mosia aiin ropui lehzualna hmu tlâka ruat a ni taroh si a. Chhûng tin hian puipa tu emaw tal an nei theuh si a; engkim puipa erawh chu Pathian a ni. Tin, chu mi hnua thu la sawi tûrte hriattîr nân Mosia chu Pathian chhûngte zawng zawng zînga rawngbâwltuah zawng a rinawm ngei a; Krista erawh chu Pathian chhûngte chung a Fapaah a rinawm a ni. A chhûngte chu keimahni kan ni, atâwp thlengin kan huaina leh kan beisei chhuanna hi nghet taka kan vawt tlat phawt chuan.”

Kristian chhûngkaw nun: Nun han tih hian, nitina kan chhûngkaw khawsak leh awmdân hi a ni mai awm e. Eden bawhchhiatna avângin mi zawng zawng hi suala piang kan ni a, Lal Davida pawhin, “Ngai teh, khawlohnâa dinin ka awm a; ka nu’n sualin mi pai a,” (*Sam.51:5*) a ti a. Mihring chu suala piang, mahni hmasial kan nih avângin

kan nitin nun khawsak hi a hahdam thei tak tak thîn lo a ni. Mi thiam (economist) hovin **‘Mihring duhna hian chin lêm a nei lo’** an tih hi a dik hlein a lang. Kan neih tâwk aia tam, kan hlawh aia tam, kan thawhchhuah aia tam neih tumna hian nun a tihahdam thîn lo va, kan nitin nun khawsak hi a buai thîn a ni.

Kristian chhûngkaw nunah chuan Krista’n ro a rêl a, an neih ang tâwkah te, an thawhchhuah theih tâwkah te, an hlawh ang angah an lungawi thei a, an lungawina chuan an nun a tihahdamin a tinuam thîn a ni. Engkimah, Pathian pêkah an ngai a, an hlim em em a ni.

Tirhkoh Paula chuan, “*Ka tlâkchham thu sawi zawng ka ni lo ve; kei zawng eng ang pawhin awm mah ila, lungawi zêl ka ching tawh si a. Tlâwm taka awm dân ka thiam a, hausaa awm dân pawh ka thiam bawok a; thil tinrêngah leh thil zawng zawngah tlai leh ril tâma awm dân, hausa leh tlachhama awm dân thurûk chu ka hre chhuak tawh,*” (**Philippi 4:11-12**) a tih nun hi Kristian chhûngkua chuan an neih ve tlat avângin an nitin nun khawsakah an lungawi thei zêl a ni.

Kristian chhûngkaw nun chu, ei tûr an tlâkchham deuh pawhin an buai lo va, harsatna leh buainaten a tlâk buak pawhin pawm dân tâwk an thiam a, an hahdam thîn a ni. Pathian malsâwmna an dawn avânga an lo hausa deuh a nih pawhin chapo nân leh uanthuan nân an hmang lo va, a dawn dân tâwk an thiam a, an nun a hahdam êm êm thîn a ni.

Sum leh pai tam tak neih emaw, in leh lo tha tak tak neih ringawt hi Kristian chhûngkua ni lo tân chuan nun a tihahdam zo tak tak lo, a aia tam leh a aia tha duhnain an rilru a tihah fo zâwk a ni.

Kristian chhûngkua thung chu, Krista avângin engkimah an lungawi theih zêl avângin an nun a nuamin a hahdam thîn a ni. Kan damchhûng tawiteah hian nun a lo hlima a lo nawm deuh deuh theih nân Kristian chhûngkua i din zêl ang u.

1. Sual a leng lo: Mihring nun tihrehawmtu, harsatna leh buaina thlentu ber chu **Sual** hi a ni. Sual sawifiah dâwn chuan sawi tûr tam tak a awm thei ang, a tawi zawngin sawi ta ila, Pathian duh loh zâwng zawng hi Sual chu a ni mai awm e. Hebrai tawngah chuan Sual hi **Khata** tih a ni a, a awmzia chu **‘tum thelh, tum fuh lo’** tihna a ni a. Greek tawngah chuan Sual hi **Hamartia** tih a ni a, a awmzia chu **‘Dân bawhchhia’** tihna a ni. A khaikhâwm nân chuan Sual chu **‘tihtûr tih loh, dân zawm loh’** tihna a ni mai awm e.

Pathian thu chuan Pathian dân bawhchhiatna leh a laka helna hi Sual tiin a sawi a ni. Sual inţanna chu Vantirhkoh zinga mi Lucifer-a khân a dinhmunah lungawina a nei lo va, Pathian aia chungnung nih duhna chuan Evi leh Adama kha dân bawhchhe tûrin a thlem thlu a ni. Lucifer-a khân, Pathian duh loh zawnga thil a tih avângin vântirhkoh a nihna aţanga paihthlâkin a awm a, Sual chu Evi leh Adama thlahte zawng zawng chungah a lo tla ta a, **Rom 3:12**-ah chuan, “...*tumah thil tha ti rêng an awm lo, Pakhat tê mah an awm hauh lo,*” tih kan hmu a ni.

Sual chuan mi zawng zawng chungah ro a rêl tâk avângin, Pathian dân an zawm lo va, Pathian ropuina pawh an chang zo ta lo a ni. Pathian hmangaihna chuan mihring churawn ûm zuiin, Isua Krista churawn tîrin, kan sualna leh bawhchhiatna zawng zawng chu phurh tîrin, kan tuar ai tuarin, kan thih ai a lo thi ta a ni. Isua Krista chu kan tuar ai tuarin kan thih ai a thi a ni tih pawmtu

apiangte chu sual lak aţangin an zalên a ni. “*Chutichuan tânah zawng Krista Isuaa awmte tân chuan thiam loh chantîrna rêng a awm tawh lo,*” tih **Rom 8:1**-ah kan hmu a ni.

Krista neitu zawng zawngte chuan chhûngkua an din pawhin Kristian chhûngkua an din nghâl a ni. Kristian chhûngkuaah chuan sualnain thu a nei tawh lo va, intihbui, inhuat, insual bur bur, zu ngawlvei, drugs ngawlvei, in itsîk etc. ten hmun an chan tawh lo avângin, Kristian chhûngkua chu hmangaihna a tuam tlat tawh avângin an hlimin nuam an ti êm êm a ni.

2. Vânram tem lâwkna: Kristian chhûngkua nih chu Vânram tem lâwkna a ni. Vânram tih leh Pathian ram tih hi tawng thuhmun a ni a, a hmangtu azirin, Vânram tih leh Pathian ram tih hi an hmang mai a ni.

Vânram chu ramri nei lo, Pathian rorêlna leh lalna hmun apiang hi a ni. Vânram chu he khawvêl piah lama Pathian nen chatuana ro kan rêlna hmun tûr a ni, Isua’n, “*Ka ram chu he khawvêla mi a ni lo,*” (**Johana 18:36**) a tih hian chatuan hmuna ro a rêlna tûr hmun a sawina a ni a. Tin, kawng leh lamah chuan Isua’n Pharisaite hnênah, “*Pathian ram chu in zîngah a awm a ni,*” (**Luka.17:21**) tiin a chhâng leh bawk a ni. Vânram chu tânah hian kan tem lâwk a, a famkimna erawh chu chatuan hmunah a ni.

Vânram chu Pathian rorêlna hmun a nih avângin, thihna te, natna te, lungngaihna te, piansualna te, buainaten hmun an chang lo a ni. Hmangaihna ro a rêl tawh zâwk avângin, nuam zawng zawng chatuanin an nei tawh dâwn a ni. Vânramah chuan kan hmangaih kaltate nen khân hlim takin kan inhmukhâwm leh dâwn a,

chutah chuan, inthenna rêng rêng a awm tawh lovin, chatuanin hmangaihte nên kan lêng za tawh dawn a ni.

Vânram chu hmun thianghlim a nih avângin, tuna kan taksa hian, bawhchhiatna avângin Vânram chu a luah theih dawn loh avângin, vaivuta siam kan nih ang bawkin vaivutah a kir leh ang a, kan thlarau chu nunna min petu Pathian hnênah a kir leh ang a, kan taksa pawh tihdânglamin a awm tawh ang a, chatuanin Pathian nen ro kan rêl tawh dawn a ni.

Kristian chhûngkuaah chuan Krista'n ro a rêl tawh avângin, sualnain hmun a chang lo va, hmangaihna hmun a chan tawh zâwk avângin chhûngkua a hlim a, a nuam êm êm a, Vânram an tem lâwk a ni. Kristian chhûngkuaah chuan, natna te, thihnatên rorêl mahse, Krista'n a awmpui tlat avângin, hlauhna a bo va, thlamuang takin an awm thîn a ni.

George Bernard Shaw-a chuan, *“Chhungkaw hlim chu Vânram hmasa,”* tiin a lo sawi a. Vânramah chuan nuam zawng zawng an nei a, tân damchhûnga chhûngkaw hlimna leh lâwmna hi Vânram temlâwkna chu a ni.

3. Pathian malsâwm dawnna hnâr: Kristian chhûngkua chu Krista nêna lêng dîn a nih avângin Pathianin a ensan ngai lova, kawng engkimah malsâwmnain a vûr thîn a ni. Malsâwmna tih hi tawngkam hausa tak mai, thumal pahni khat maia han sawifiah sên a ni lova. A phênah hian thu thûk leh ropui tak a inphûm a. Ringtute tân Pathian nun tawmpuina, vânnêihna leh nihlawhna lam sawina niin a lang. Mite an thatna tûra tihsak, thil siam dângte tâna thil tha tih, a tha apiang induhsak, taksa leh thlarau lam nuna hamthatna a keng tel a ni.

Pathianin Abrahamana Ur khua aṭanga a koh chhuah khân kum 75 mi a ni a. Pathianin Abrahamana hnênah chi ropui takah ka siam ang chia, mal pawh ka sâwm ang chia, i hming ka tiropui bawh ang, tin, nang malsâwmna ni ang che (**Genesis 12:2**) a tih lai khân fa a la nei lo, mahse a hnua Pathianin malsâwmna tam takin a vûr a, a thlahte aṭangin khawvêl chhandamtu Lal Isua a lo piang a ni.

Malsâwmna dawn hian sum leh pai, in leh lo bâkah hriselna leh hmuingîlna a keng tel a ni. Pathian chuan amah ringtu leh amah zuitute chu eng lai mahin a ensan ngai loh avângin, harsatna leh manganna an tawh lai pawhin a awmpui reng ṭhîn a ni. Kristian chhûngkua chu engkimah Pathian kutah an inkawltîr a, a duhzâwng tih leh a duh dân anga awm chu ngaih pawimawh berah an neih avângin a hun takah an mamawh ang zêlin Pathian malsâwmna an dâwng ṭhîn a ni.

Deuteronomy 28:2-ah chuan, “*Lalpa in Pathian thu in pawm phawt chuan hêng malsâwmna zawng zawngte hi in chungah a lo awm ang a, a zui zêl ang che u,*” tih kan hmu a. Helai thu aṭang hian Pathian chuan a mite chu amah nêan an inpâwl a, a duhzâwng anga an awm chuan a malsâwmnaa umzui a tiam a ni. A malsâwmna an dâwn zêl theih nân leh atâna an rinawm zêl theihna tûra fuihna a ni bawh a ni.

Pathian malsâwmna dâwng tûr chuan, Kristian chhûngkua chu Pathian tâna rinawm taka awm reng a ngai ve thung a ni. Malsâwmna dâwng tûr chuan malsâwmna nih ve a ngai a ni.
